

इवनिंग डोगरी न्यूज़ बुलेटिन

समै .18:15 Hrs

<><><><><><>

Headlines

- 1 महाकुम्भ च हिस्सा लैने आहले श्रद्धालुएं दी सुरक्षा यकीनी बनाने लेई विशेष दिशा-निर्देश ते नियम लागू करने दी मंग आहली याचिका पर कल सुप्रीम कोर्ट च सुनवाई होग।
- 2 जम्मू-कश्मीर दी टीम नै रणजी ट्रॉफी क्रिकेट टूर्नामेंट दे ग्रुप-ए दे इक्क बड्डे मुकाबले च बड़ौदा गी 182 रन्जें कन्नै हराइयै क्वार्टर फाइनल च अपनी थाह पक्की करदे होई अज्ज इक्क नमां इतिहास रची दिता ऐ।
- 3 जम्मू-कश्मीर सरकार नै अपने मलाज़में लेई उंदी संपत्तिएं मतल्लक सलाना रिटर्न (पीआरएस) पोर्टल उप्पर जमा करोआने दी खीरी तरीक बधाइयै 15 फरवरी 2025 करी दिती ऐ।
- 4 महिलाएं दे अंडर-19 टी-20 क्रिकेट विश्व कप दे फाइनल च भारत नै दक्खन अफ्रीका गी 9 विकेटें कन्नै हराइयै खिताब फही अपने नांस करी लैता ऐ।
- 5 मौसम विभाग नै आखेआ ऐ जे औंदी 10 फरवरी तोड़ी जम्मू-कश्मीर च टामी-टामी थाहरें पर बरखा ते उच्चियें धारें पर बर्फबारी दे असार न।

<><><><><><>

Supreme Court Mahakumbh

सुप्रीम कोर्ट च कल इक याचिका पर सुनवाई होग जिसदे च महाकुंभ च हिस्सा लैने आहले श्रद्धालुएं दी सुरक्षा यकीनी करने आस्तै विशेष दिशा-निर्देश ते नियम लागू करने दी मंग कीती गई ऐ। महाकुंभ च पिच्छले बुधवार गी भगदड़ च घटोघट्ट 30 लोक मारे गए हे ते 60 लोक घायल होई गए हे। सुप्रीम कोर्ट दी वेबसाइट पर जारी सूची च मुख्य न्यायाधीश संजीव खन्ना ते न्यायमूर्ति संजय कुमार हुन्दी पीठ इसदे कन्नै सरबंधित जनहित याचिका दी सुनवाई करौंग। याचिका च भगदड़ दी घटनाएं गी रोकने ते संविधान दी दफा 21 तैहत समानता ते जीवन दे मौलिक अधिकारें दे संरक्षण दी मंग कीती गई ऐ। इस याचिका च राज्यें गी एह निर्देश देने दी बी मंग कीती गई ऐ जे ओह प्रयागराज च अपने अपने सुविधा केंद्र स्थापित करन ते आपात स्थिति च अपने अपने राज्यें दे नागरिकें दी सुरक्षा संबंधी जानकारी उपलब्ध करान ते सहायता करन। याचिका च महत्वपूर्ण व्यक्तियें दी आवा-जाही दे नियम बनाने ते आम लोकें दी सुरक्षा गी तरजीह देने दी मंग कीती गई ऐ।

<><><><><><>

Special-Train

बसंत पंचमी पर त्रीये अमृत स्नान दे मौके पर रेलवे, प्रयागराज दे बक्ख-बक्ख रेलवे स्टेशनें थमां 400 शा मती महाकुम्भ मेला विशेष रेल गड्डियां चलाग। एहदे कन्नै लक्खां बद्दे श्रद्धालुएं गी विजन कुसै रूकावट दे जातरा करना यकीनी बनाया जाग। त्रीया अमृत स्नान कल होग जेदी पच्छोक्कड़ै च रेलवे आसेआ एह महत्वपूर्ण गैह पुट्टी गई तां जे बसंत पंचमी पर अमृत स्नान दौरान भक्तें गी कोई दिक्कत या परेशानी नई झल्लनी पवै। आकाशवाणी समाचार कन्नै गल्ल करदे होई उत्तर मध्य रेलवे दे मुख जनसंपर्क अधिकारी शशिकांत त्रिपाठी होरें आखेआ जे रेलवे आसेआ बसंत पंचमी पर बी उस्सै चाल्ली दी तैयारियां कीती जा'रदियां न जियां मौनी अमावस्या पर कीती गई ही।

<><><><><><>

Prez. PM Basant panchmi

बसंत पंचमी दा त्यौहार अज्ज पूरे मुल्खै च बड़े उत्साह कन्नै मनाया जा'रदा ऐ। इस मौके पर लोक विद्या ते ज्ञान दी देव मां सरस्वती हुंदी पूजा करदे न। इस त्यौहार गी बसंत ऋतु दी शुरुआत दे तौर पर मन्नेआ जंदा ऐ। इयां मन्नेआ जंदा ऐ जे बसंत पंचमी दे बाद फुल्ल पंखुड़ियां नमें सिरेआ खिड़ना शुरू होई जंदियां न। इनैगी नमीं पोंगर पौंदी ऐ। इस मौके पर राष्ट्रपति द्रौपदी मुर्मू ते प्रधानमंत्री नरेंद्र मोदी होरें लोकें गी शुभकामनां दितियां न। सोशल मीडिया पर अपने इक स्नेह च राष्ट्रपति मुर्मू होरें आखेआ जे एह त्यौहार सब्बनै लेई खुशियां ते रमानदारी लेइयै आवै। प्रधानमंत्री मोदी होरें बी अपने स्नेह च इस त्यौहार दियां सब्बनै गी शुभकामनां दितियां।

<><><><><><>

Udh. Basant Panchmi

पूरे मुल्खै आहले लेखा जम्मू-कश्मीर च बी बसंत पंचमी दा त्यौहार बड़ी खुशी ते उत्साह कन्नै मनाया गेआ ते विद्या दे ज्ञान दी देवी मां सरस्वती हुंदी पूजा-अर्चना कीती गई। उधमपुर जिले च इक वृद्धाश्रम च इक कार्यक्रम दा आयोजन कीता गेआ जित्थे बड़ी मती गिनतरी च लोकें हिस्सा लैता। इस मौके पर उत्थे कई सांस्कृतिक गतिविधियां दा आयोजन कीता गेआ। इस मौके पर पूरे जिले दी बक्ख-बक्ख थाहरें पर लंगर बी लाए गेदे हे। आकाशवाणी समाचार कन्नै गल्ल करदे होई जागृति वृद्धाश्रम दे प्रधान जुगल किशोर गुप्ता होरें आखेआ।

<><><><><><>

Ranji Cricket

जम्मू-कश्मीर दी टीम नै रणजी ट्रॉफी क्रिकेट टूर्नामेंट दे ग्रुप-ए दे इक्क बड्डे मुकाबले च बड़ौदा गी 182 रन्जें कन्नै हराइयै क्वार्टर फाइनल च अपनी थाह पक्की करदे होई अज्ज इक्क नमां इतिहास रची दिता ऐ। टॉस जित्तिथै पैहले बल्लेबाजी करदे होई जम्मू-कश्मीर नै पैहली पारी च 246 रन्ज ते दुई पारी च 284 रन्ज बनाए ते बड़ौदा गी जित लेई 365 रन्जें दा इक्क बड्डा लक्ष्य दिता। उआं बड़ौदा अपनी पैहली पारी च छड़े 166 रन्ज ते दुई पारी च छड़े 182 रन्ज गै बनाई सकी।

<><><><><><>

Life Time Achievement

महान क्रिकेट खडारी ते भारत रत्न कन्नै सम्मानित सचिन तेंदुलकर होरें'गी मुम्बई च आयोजित नमन अवार्ड 2025 दौरान बी.सी.सी.आई आसेआ कर्नल सी.के नायडू लाइफ टाइम अचीवमेंट अवार्ड कन्नै सम्मानित कीता गेआ ऐ। आई.सी.सी दे अध्यक्ष जय शाह होरें सचिन तेंदुलकर होरें गी भारतीय क्रिकेट लेई बेजोड़ योगदान गितै एह सम्मान दिता। उन्दे अलावा भारत दे तेज गेंदबाज जसप्रीत बुमराह होरें'गी बड़ी मती प्रतिष्ठा आहले पॉली उमरीकार अवार्ड कन्नै सम्मानित कीता गेआ ऐ। तोआई, भारतीय महिला टीम दिएं उप-कप्तान स्मृति मंधाना ते स्पिन गेंदबाज आर. अश्विन होरें'गी बी बक्ख-बक्ख श्रेणिएं च सम्मानित कीता गेआ।

<><><><><><>

Announcement

केन्द्री बजट 2025-26 बारे आकाशवाणी दा क्षेत्रीय समाचार एकांश जम्मू अज्ज इक विशेश परिचर्चा प्रसारत करोग। 45एं मिंटे दा एह परिचर्चा अज्ज रातीं 8 बजे साढ़े प्राइमरी चैनल पर प्रसारित कीती जाग जेहड़ा तुस मीडियम वेव 303 मीटर यानि 990 किलोहर्टस एफएम 100.3 मैगाहर्टस ते डीआरएम 981 किलोहर्टस पर सुनदे हो। इस परिचर्चा च समाज दे बक्ख-बक्ख वर्गे कन्नै तालुक रखने आले माहिर बजट दे बक्ख-बक्ख पैहलुएं पर चर्चा करगंन।

<><><><><><>

PRS-Deadline

जम्मू-कश्मीर सरकार नै अपने मलाज़में लेई उंदी संपत्तिएं मतल्लक सलाना रिटर्न पीआरएस पोर्टल उप्पर जमा करोआने दी खीरी तरीक बधाइयै 15 फरवरी 2025 करी दिती ऐ। पैहले एह समें-सीमा 31 जनवरी तगर दी रक्खी गेदी ही पर केई सारे मुलाज़म, इस समें-सीमा दे अंदर एह रिटर्न जमा नेई करोआई सके जेहदे चलदे इसी बधाने दा फैसला लैता गेआ ऐ। सरकारै इब्बी आखेआ इस हुकमै दी पालमा नेई करने ते तय समें-सीमा दे अंदर-अंदर एह रिटर्न जमा नेई करोआने आहलें खलाफ कार्रवाई कीती जाहग जेहदे च भ्रष्टाचार दी रोकथाम सरबन्धी कानून तैहत जुर्माने लाना ते विजिलेंस क्लीयरेंस नेई दिता जाना बी शामिल होग। ओकड़े मुलाज़म, जिनें'गी अपनी संपत्तिएं मतल्लक सलाना रिटर्न भरने च कोई बी दिक्कत पेश औंदी ऐ उनें'गी एह सलाह दिती गई ऐ जे ओह अपने संपर्क ब्यौरें गी अपडेट करन ते अधिकारिक ईमेल support-prs@jk.gov.in उप्पर संपर्क करियै मदाद हासल करन।

<><><><><><>

MLA-Banihal

बाल विकास सरबन्धी आई.सी.डी.एस स्कीम तैहत नमी भर्ती होए दी आंगनवाड़ी वर्करें ते हेल्परें गी नियुक्ति पत्र सौंपे गए। एह इनें'गी बनिहाल थमां एमएलए सज्जाद शहीन होरें सौंपे। इस पैहलकदमी दा मकसद खिते च जच्चे-बच्चे दी दिक्खभाल, इंदा लालन पालन पोषण ते भलेआं लौहकी उम्री दे न्याणें दी शुरूआती दिक्खभाल सरबन्धी सेवाएं गी बेहतर बनाना ते मजबूत करना ऐ। इस दौरान तकरीबन 15 आंगनवाड़ी वर्करें ते हेल्परें गी नियुक्त कीता गेआ ऐ। इस मौके पर बोलदे होई एमएलए सज्जाद शहीन होरें महिला सशक्तिकरण ते बाल कल्याण च आंगनवाड़ी वर्करें दी अहम भूमिका उप्पर लोह पाई। उनें आखेआ।

<><><><><><>

Labour Camp

मकामी कर्मचारिएं गी सशक्त बनाने दी दिशा च इक महत्वपूर्ण गैह दे तौर पर रामबन दे सना ग्रां च इक जागरूकता शिविर दा आयोजन कीता गेआ। एहदी अध्यक्षता असिस्टेंट लेबर कमीशनर अमित कुमार होरें कीती। ग्रां दे लोकें गी बक्ख-बक्ख श्रम कनूनें, वक्रर वैलफेयर बोर्ड तैहत योजनाएं ते वजीफें बारे जानकारी दिती गई। एहदे अलावा असिस्टेंट लेबर कमीशनर हुंदे आस्सेआ लोकें गी रोजगार पैदा करने आले कार्यक्रम पीएमईजीपी, ई-श्रम ते होरनर जेहड़ी जानकारीयें तैहत फायदें बारे लोकें गी अवगत करोआया गेआ।

इस मौके पर असिस्टेंट लेबर कमिशनर अमित कुमार होरें आखेआ।

<><><><><><>

ICC-T-20 World Cup

महिलाएं दे अंडर-19 टी-20 विश्व कप दे फाइनल च भारत नै दक्खन अफ्रीका गी 9 विकेटें कन्नै हराइयै खिताब परतियै अपने नां करी लैता ऐ। एह् खिताबी मुकाबला मलेशिया दे कुआलालंपुर च खेड़ोआ गेआ। पैहले बल्लेबाजी करदे होई दक्खन अफ्रीका दी टीम छड़ी 82 रन्ज गै बनाई सकी। इस आसान लक्ष्य दा पिच्छा करदे होई भारती टीम नै छड़े 12 ओवरें च गै एह् लक्ष्य हासिल करी लैता। भारत दी तरफा Gongadi Trisha होरें नाबाद 44 रन्ज बनाए। उनेंगी 'प्लेयर ऑफ दा मैच' कन्नै नवाजेआ गेआ। एहदे अलावा त्रिशा होरें इस विश्व कप च सब्बनै शा मते 309 रन्ज बनाइयै 'प्लेयर ऑफ दा टूर्नामेंट' खिताब बी हासल कीता ऐ।

<><><><><><>

Weather

मौसम विभाग नै जम्मू-कश्मीर च 10 फरवरी तगर किश थाहें पर रूकी-रूकियै बरखा बरने ते बर्फ पौने दा पूर्वानुमान लाया ऐ। मैहकमे दा आखना ऐ जे अज्ज रातीं थमां लेइयै कल चिरें रातीं तगर मौसम बदलोखड़ा रेई सकदा ऐ ते उप्परली धारें पर हल्की बरखा ते बर्फ पेई सकदी ऐ। एहदे अलावा 4 थमां लेइयै 5 फरवरी तगर गासै च बदल घनोए दे रौहने ते टामी-टामी थाहरें पर हल्की थमां दरम्याने दर्जे दी बरखा बरने ते बर्फ पौने दे इमकान दस्से गेन जिस्सलै के 6 फरवरी थमां लेइयै 8 फरवरी तक्कर मौसम बदलौखड़ा ते खुश्क रौहने दी पेशनगोई कीती गेई ऐ। मैहकमे आसेआ जानकारी दिती गेई ऐ जे 9 ते 10 फरवरी गी जम्मू-कश्मीर दी किश थहरें पर ताजा बर्फबारी ते बरखा बरी सकदी ऐ। मैहकमे आसेआ लोकें गी सलाह दिती गेई ऐ जे ट्रैफिक विभाग ते प्रशासन आसेआ दिशा-निर्देशों दी पालमा करदे होई गै सफर करन।

<><><><><><>
